

Storia dela ceseta dela Madona dela Carità

(In maranese)

di Claudio Damonte

Sta volta voi parlave dela Ceseta che ‘na volta se troveva tacada al campanil in piassa, in tel spiasso che ‘desso se ciama piassa dei providituri. De ‘sta cesa i scriti i disì che, de probabile, la gera la seconda cesa dela fortessa de Maran dopo quela de San Giovanni, che la gera stada fata, insieme co’ la fortessa stessa, dove che ‘desso xe via Garibaldi in fondo de le case gniove. La cesa dela Madona dela Carità la xe nata co’ la trasformassion de la popolassion che da pagana la xe diventada cristiana ai tempi de l’imperator de Roma Costantino. I scriti de quel tempo i disì che la veva el pavimento fato duto in mosaico con dei disegni ben precisi de pisci.

‘Sto tipo de disegno lo trovemo spesso quando che xe sto’ la granda expansion del Cristianesimo. Quela volta, par fasse capì che se gera cristiani, el Signor se figurava con el simbolo de un pesse; la Crose, come simbolo, la xe rivada tanti ani dopo. ‘Sta seconda cesa, xe probabile che la sia stada costruìa slargando una che la gera za prima come capela in tel IV° secolo D. C.

Xe sto mantignù el pavimento de prima e al posto de un campanil de legno, che el faseva anca de punto de avvistamento, col tempo vien fato un de piera e moduni. Questo, in tel 1903 el xe cascò come un sacco svodo senza faghe mal a nessun. Però no’ duto el xe cascò, ma sol che fin al ziro dove che se trova le statue fate mete dai providituri venessiani. Dopo el xe sto rifato usando le piere dela demolission dela fortessa. El vien ciamò tore millenaria dai ani de ste piere, ma quel che xe dale fundamenta a le statue el ga domile ani Gera da ‘sta ceseta e anca da altre, che se troveva intorno, che partiva, in quel tempo, i pelegrini che voleva ‘ndà in Tera Santa.

I partiva anca dai porti de Bevassana e da Latisana. In tel 778 gera tante persone che dal palù de Venessia le vigniva in Friuli, soraduto dopo che l’isola de Malamocco la gera sprofondada in mar a causa de un tremendo taramoto. La ceseta dela Madona dela Carità la xe stada butada sò ‘naltra volta mantignindo però sempre el steso pavimento con in tel meso la tomba del primo cristian del paese de Maran. El teto dela gnova cesa el vien costruìo in maniera semplice con travi e cupi inciodài direti sui listèi. El monaco dela capriada el sostigniva un vero piturò a man dala parte del drento. A causa de l’acqua alta, che tante volte entreva

in fortessa, i muri i vigniva sempre più smagnà. Cussi se gà dovesto fa 'na squadra de persone pronta a intervignì par rinforsà i muri. 'Sta confraternita de muraduri e scarpelini la viveva a spese dela comunità con una rendita fissa 'bastansa bona. Rivài in te l'ano mile, la ceseta la vien rifondada sempre con el nome dela Madonna dela Carità. Quando che gera papa Pio II (1458-1464), vescovo a Trieste xe sto mandò Enea Silvio Piccolomini. Prima de rivà a Trieste, 'sto vescovo el se ga fermò par un per de zurni in fortessa a Maran e el ga volesto visità 'sta cesa che la custodiva la tomba del primo cristian de Maran. Le visite che i viscuvì i gà fato a Maran xe stae poche in confronto a quele fate in forma no' ufficial. Queste visite gera un ben parchè ogni volta el patriarca, o el vescovo, el lasseva un bel grumo de schei.

La ceseta dela Madonna dela Carità la viveva però soraduto grassie ale elemosine che le finiva dute in tele casse ecclesiastiche. Queste casseforti le gera tanto piene che le vigniva sorvegliae a turno, zorno e note da un piccolo reparto de omini armai (in vintisie), che i veva de risponde sol che de questo compito. Quando che la fortessa la xe passada soto ai imperiai el numero de 'sti omini el xe sto 'dirittura radopiò parchè che ghe xe sto do anca el compito de fa la guardia a le paghe dei militari. A fa parte de 'sti omini se ga trovò zente de rasse diverse, slavi, todischi, taliani, ungherisi.

Quisti, pian pian, i ga scumissìo a ve pretese de gesse tratai squasi come i providituri o poco manco. Tante robe i le ga otignùe come el magnà de prima qualità, periodi de riposo dopo ogni settimana de guardia e altro. Tornando a la ceseta, el Patriarca el se veva inacorto che la diventeva sempre più siora e importante e 'lora el ga scurtò el territorio che la comandava e la ga messa a le dipendense de altre do cese, quela de Sant'Antonio de via orti e quela de San Rocco (dove che xe el monimento ai morti dela prima guera).

Cussi la ga scumissìo a perde importansa e indipendensa inissiendo la fine. Anche le confraternite le ga lassò 'ndà in malora la ceseta. Intel 1963 trovemo scritto so un incartamento che la cesa dela Madonna dela Carità la xe passada a le dipendense dela prima cesa de San martin. Dopo la sua demolission l'altar dela Madonna dela carità el xe sto portò da 'na cesa a quel'altra fin al 1922 quando che el xe sto venduo a un altro paese del Friuli par 500 franchi. El campanil par la sua funsion de prison (dove che prima gera la stanza dei forestieri) el se ga salvò dala distrussion anca parchè el gera ancora ben conservò. Xe cussi che el xe sto restituio ala sua primitiva funsion: campanil par i paesani e tore de avistamento par quìi altri.